



**DISKURSU HOSI PRIMEIRU-MINISTRU  
REPÚBLIKA DEMOKRÁTIKA TIMOR-LESTE,**

**Taur Matan Ruak**

Iha Aprezentasaun Proposta  
Lei Orsamentu Jerál Estadu nian ba tinan 2020

Parlamentu Nasional, 15 Janeiru 2020

Exelénsia  
Senhor Prezidente Parlamentu Nasional

Exelénsias  
Senhores Viseprezidente sira no Sekretáriu sira Meza Parlamentu Nasional nian

Exelénsias  
Senhoras Deputadas no Senhores Deputados iha Parlamentu Nasional

Exelénsias  
Senhoras no Senhores Membrus Governu Konstitutional VIII nian

Distintas no Distintus Konvidadus

Senhoras no Senhores

Ho onra boot maka ha'u, lori Governu Konstitutional VIII nia naran, apresenta ba Parlamentu Nasional, kamaru magna husi reprezentasaun demokratica ita-nia Povu nian, proposta lei ne'ebé aprova Orsamentu Jerál Estadu no Orsamentu Seguransa Sosial nian ba tinan 2020 ida-ne'e.

Iha oportunidade ida-ne'e, ha'u hakarak rekohese no agradese esforsu hirak ne'ebé dirigente no funzionariu sira administrasaun publica nian tomak hala'o ona, nune'e mós husi Exelénsias Senhores Membrus Governu no husi Ilustre Deputadu sira iha Parlamentu Nasional, atubele prepara no viabiliza diskusaun proposta lei ne'ebé ohin hahú no ne'ebé ninia aprovasaun importante tebe-tebes ba funzionamento di'ak husi ita-nia Administrasaun Publica no ba kreimentu husi ita-nia ekonomia nasional.

Nu'udar responsavel politiku nasional sira, ita hatene didi'ak no ita labele ignora konsekuénsia ladi'ak sira ne'ebé mosu ona husi períodu naruk ezekusaun orsamental iha rejime duodesimal ba ita-nia ekonomia no ita hein katak sei labele akontese fali tan.

Tanba konxiente kona-ba nesesidade ne'ebé urgente atu fó ba Estadu orsamentu ida ne'ebé bele responde ba eziénsia sira husi ita-nia sosiedade no ita-nia ekonomia, no ho respeitu tomak ba kompeténsia konstitutional sira Parlamentu Nasional nian, maka Governu dada fila-fali ona proposta lei orsamental ne'ebé apresenta ona iha fulan-outubru liubá, no substitui proposta refere ho ida ne'ebé ohin submete ona hodi halo diskusaun.

Desizaun atu dada fila-fali proposta lei orsamental ba tinan 2020 nian anteriór no hodi reformula proposta ne'e tuir rekomendasaun sira ne'ebé aprova ona husi komisaun parlamentar oioin la'ós foti nune'e de'it no iha desizaun ne'e fó mós importânsia ba preokupasaun atu garante prezervasaun ba estabilidade politika no aprovasaun Orsamentu Jerál Estadu ba tinan 2020, kompromisu sira ne'ebé assume ona iha tinan 2018 husi maioria Deputadu sira ne'ebé eleitu iha lejizlatura ida-ne'e no husi membru sira Governu Konstitutional VIII nian iha eleisaun ne'ebé hala'o ona iha tinan 2018.

Tanba devér atu respeita ba kompromisu sira ne'ebé assume ona ba ita-nia Povu maka Governu dada fila-fali ona ninia proposta lei orsamental no apresenta ona proposta lejizlativa foun, ne'ebé bele simu preokupasaun sira husi Parlamentu Nasional no bele hatán loloos ba ninia rekomendasaun sira.

Iha kontestu internasional ne'ebé la estavel no laiha serteza liután, preokupasaun ho estabilidade politika no kriasaun kondisaun nasional sira ba ambiente ida-ne'ebé favoravel ba kreimentu ekonomiku no ba moris-di'ak sosial maka assume importânsia boot liután.

Senhor Presidente  
Senhoras no senhores Deputadus,

Maske iha krítika no buat balun ne'ebé Senhores Deputadus barak halo ona identifika ona no hato'o ba Governu, no ha'u konsidera lejítimu iha kuadru debate polítku ne'ebé onestu no demokrátiku, ha'u labele husik hodi manifesta ha'u-nia satisfasaun no orgullu ba rezultadu barak ne'ebé Governu ne'e alkansa ona durante tinan fiskál ne'ebé foin remata ona.

Tanba ne'e, no maske limitasaun ne'ebé mosu tanba membru Governu Konstitusionál VIII seidauk hetan nomeasaun no pose hotu husi Senhor Presidente Repúblika, situasaun polítki ne'ebé laiha paralelu iha momentu sira uluk husi ita-nia istória, no ne'ebé kauza obstáculu boot tebes ba asaun governativa, maske nune'e, ita bele haree sinál sira rekuperasaun no aselerasaun ba kreiximentu ekonómiku, liului liuhusi konstatasaun ba kreiximentu PIB reál naun petrolíferu, ne'ebé ita prevee besik 4% (porsentu haat) iha tinan 2019 no besik 6% (porsentu neen) ba tinan 2020 ida-ne'e.

Rezultadu hirak ne'e la'ós resultado ne'ebé la iha importânsia karik ita haree katak iha tinan 2017 no 2018 PIB reál naun petrolíferu maka, maizumenu -3,8% (menuis tolu vírgula porsentu ualu) no -0,8% (menuis zero vírgula porsentu ualu).

Nune'e, kreiximentu husi Produtu Internu Bruto (PIB) real naun petrolíferu iha tinan 2019 maka ida-ne'ebé boot liu ne'ebé maka rejista ona dezde tinan 2014, bainhira atinje tiha 4,5% (porsentu haat vírgula lima), ka bele dehan katak, ida-ne'ebé boot liu iha besik tinan lima ikus ne'e nia laran.

Ba kreiximentu ne'ebé maka rejista ona, aumentu husi konsumu pùbliko no konsumu privadu kontribui maka'as, no ami prevee katak, iha tinan 2019, konsumu pùbliko reprezenta kuaze US\$ milaun 971 (dolar amerikanu milaun atus sia hitunulu-resin-ida) no konsumu privadu reprezenta kuaze US\$ milaun 1.054 (dolar amerikanu milaun rihun ida limanulu-resin-haat).

Kompara ho tinan hirak liubá, bele haree katak valór husi konsumu pùbliko no privadu, ne'ebé mak prevee ba iha finál 2019 nian, maka konsumu hirak ne'ebé boot liu, ne'ebé rejista dezde tinan 2016 no reprezenta ona, kompara ho 2018, kreiximentu ida kuaze US\$ milaun 124 (dolar amerikanu milaun atus ida ruanulu-resin-haat).

Investimentu ne'e mós kontribui ona, ho forma pozitiva, ba kreiximentu husi ita-nia Produtu Internu Bruto (PIB) real, no ita prevee katak iha 2019 investimentu sei reprezenta kuaze US\$ milaun 544 (dolar amerikanu milaun atus lima haatnulu-resin-haat), no husi valór ida-ne'e, US\$ milaun 147 (dolar amerikanu milaun atus ida haatnulu-resin-hitu) refere ba investimentu privadu no US\$ milaun 397 (dolar amerikanu atus tolu sianulu-resin-hitu) refere ba investimentu pùbliko.

Valór totál husi investimentu ne'ebé prevee, ne'ebé halo tiha ona durante tinan 2019 ninia valór hanesan ho sira ne'ebé maka rejista ona iha 2017, dook husi US\$ milaun 653 (dolar amerikanu milaun atus neen limanulu-resin-tolu) ne'ebé investe ona iha 2016

Maske nune'e, no detalle ida-ne'e relevante tebes, investimentu pùbliko iha 2016 hamutuk maka totál US\$ milaun 527 (dolar amerikanu milaun atus lima ruanulu-resin-hitu) ne'ebé maka reprezenta kuaze 80,7% (porsentu ualunulu vírgula hitu) husi valór totál investimentu nian, no investimentu privadu fixa ona iha US\$ milaun 126 (dolar amerikanu milaun atus ida ruanulu-resin-neen), ne'ebé maka reprezenta maizumenu porsentu 19,3% (porsentu sanulu-resin-sai vírgula tolu) husi valór totál investimentu nian.

Maibé, durante tinan ikus ne'e, investimentu privadu sa'e, kompara ho tinan 2016, kuaze US\$ millaun 21 (dolar amerikanu millaun ruanulu-resin-ida), ne'ebé reprezenta kuaze 27% (porcentu ruanulu-resin-hitu) husi valór totál investimentu ne'ebé hala'o ita-nia ekonomia. Ida-ne'e hakarak hatete katak, iha sorin ida, kreximentu husi investimentu privadu, kompara ho tinan 2016, reprezenta kuaze US\$ millaun 20 (dolar amerikanu millaun ruanulu), iha sorin seluk, kompara ho tinan 2018, kreximentu husi investimentu privadu estimadu maizumenus US\$ millaun 77 (dolar amerikanu millaun hitunulu-resin-hitu).

Aleinde kontribui pozitivamente ba kreximentu husi ita-nia Produtu Internu Bruto (PIB) real, evolusaun pozitiva ne'ebé rejista ona iha nível konsumu privadu no investimentu privadu reflete mós konfiansa ne'ebé maka família no empreza sira iha ba ita-nia ekonomia no ba kontinuasaun husi kreximentu ekonomia ne'e rasik.

Maske sinál no rezultadu pozitivu sira ne'ebé maka ha'u iha oportunidade atu hato'o, Governu hanoin katak iha nesesidade atu adota medida hirak-ne'ebé dudu ita-nia setór esportadór, hodi garante katak setór ne'e sai importante liután ba ita-nia Produtu Internu Bruto (PIB) real.

Senhor Presidente,  
Senhoras no Senhores Deputadus,

Maske rezultadu pozitivu sira ne'ebé alkansa ona iha domíniu investimentu privadu nian, Governu hatene katak Estadu kontinua sai implusionadór prinsipál ba kreximentu no dezenvolvimentu ekonómiku, no katak Estadu sei kontinua hanesan responsavel hodi asegura asesu ba justisa, ba inkuzaun sosiál, ba dame no toleránsia, ba protesaun ba grupu sosiál sira ne'ebé vulneravel liu, ba igualdade oportunidades no ba igualdade jéneru nian.

Governu, tanba iha determinasaun boot atu kumpre obrigasaun política no konstitutionál sira ne'ebé kompete ba Estadu, hakarak fó kontinuidade ba ezkusaun Planu Estratégiku Dezenvolvimentu PED tinan 2011-2030 no ba Roteiru 2030 kona-ba implementasaun Objetivu Dezenvolvimentu Sustentavel (ODS), hodi mobiliza, ba efeitu ne'e, setór sira ne'ebé dinámiku liu husi ita-nia sosiedade, no mós hodi kumpre meta sira ne'ebé Governu propoin iha ninia Programa ba lejislatura ne'e, atubele alkansa dezenvolvimentu no moris-di'ak populasaun nian sira.

Governu hatene katak implementasaun husi estratégia sira ne'ebé prevee iha dokumentu hirak-ne'e, no konkretizaun husi objetivo sira ne'ebé defende iha dokumentu sira-ne'e, depende, liuliu, ba vontade política órgaun soberania sira nian. Maibé, iha konviksaun katak susesu implementasaun ne'e sei depende mós ba mobilizaun husi ita-nia sidadaun sira, husi ita-nia comunidade lokál sira no husi ita-nia empreza sira.

Konstrusaun nasaun ida ne'ebé próspera, justa no perfeita liután depende ba ita-nia kapasidade atu envolve maka'as liután iha prosesu dezenvolvimentu nacionál nian ne'ebé la'o hela, maibé depende mós husi kapasidade ne'ebé ita iha hodi envolve sidadaun hotu-hotu iha prosesu ne'e, hodi garante katak laiha timoroan ida maka husik ba kotuk iha asesu ba benefísiu sira ne'ebé fó husi dezenvolvimentu ita-nia rai doben, maibé mós katak laiha ema ida mak eskluidu husi responsabilidade atu ajuda harii ita-nia Repúblika ne'e nia prezente no nia futuru.

Ho de'it esforsu husi ema hotu no ho fahe rezultadu ba ema hotu de'it, mak ita bele mehi hodi harii nasaun ida ne'ebé rika, próspera, metin no fraterna liután, ne'ebé bele valoriza potensiál ida-ne'ebé mak importante liu ne'ebé nasaun ne'e iha, maka ninia sidadaun sira.

Tanba ne'e, importante tebes ba ita atu kontinua haree liu ba iha valorizasaun potensiál umanu husi ita-nia Povu, hodi reforsa nia nível literasia no hodi aumenta nia kompeténsia profisionál sira, atu nune'e hasae ninia oportunidade hodi konkista serbisu ne'ebé dignu.

Importante mós, atu hasa'e setór privadu no kooperativu sira, liuliu ninia kapasidade investimentu nian no kriasaun rikeza, liuliu liuhusi asesu ba kréditu ida-ne'ebé fasil liu, hodi halo ninia dinâmika sei la depende liu ba despeza pública no hodi hasa'e ninia kapasidade kriasaun empregu ne'ebé barak no di'ak liután, liuliu ba jerasaun foun Timor nian, ne'ebé maske kualifikasiada no kompetente liu, ne'ebé hasoru problema boot tebes, maka dezempregu.

Presiza mak atu reforsa koezaun husi ita-nia territóriu, hodi hamenus diferença ne'ebé eziste entre meiu rurál no meiu urbanu no entre cidade Dili no munisípiu sira seluk ita-nia nasaun nian, hodi garante asesu sidadaun hotuhotu nian ba benefísiu sira husi kreximentu no dezenvolvimentu ekonómiku, la haree ba sira ho sira-nia família hela iha ne'ebé, no hodi kria kondisaun ba sira rasik, liuhusi sira nia serbisu ka sira nia negósiu, bele kontribui ba kreximentu rikeza nasaun nian.

Urgente tebes atu hametin meiu apoiu no protesaun sosiál sira ba grupu sosialmente vulneravel tebes, ho hanoin atu garante no promove dignidade ba timoroan sira hotu ne'ebé, tanba limitasaun fízika, kognitiva ka tanba idade avansada, laiha kapasidade atu fornese sira-nia meiu subsisténsia rasik ho kondisaun ne'ebé satisfatória.

Governu hatene duni katak ita-nia povu ezije intervensaun determinada husi ita-nia parte ne'ebé, liuhusi orsamentu ida ne'ebé realista, bele permite atu foti asaun ne'ebé bele hatán ba objetivu ne'ebé labele adia tan no, ho forma hanesan, bele hatán ba problema ne'ebé sidadaun sira sente, kona-ba asesu ba bee moos no saneamento, via komunikasaun ne'ebé maka di'ak liu, estabelesimento sira ba prestasaun kuidadu saúde ne'ebé di'ak-liu no estabelesimento eskolár no pré-eskolár sira ne'ebé di'ak-liu, nune'e mós kona-ba asesu ba oportunidade empregu ka negósiu ne'ebé boot no di'ak-liu.

Nune'e, no atu armoniza nesesidade hodi hatán ba nesesidade urgente ita-nia povu nian ho nesesidade atu garante respeitu ba rekomendasau sira ne'ebé maka komisaun parlamentár oioin formula ona relasiona ho proposta orsamentál ba tinan 2020 nian, Governu apresenta ona, ba diskusaun no aprovisaun husi Parlamentu Nasional, proposta Orsamento Jerál Estadu ida ba tinan 2020 nian ho despeza estimada hamutuk US\$ milaun 1.668 (dolar amerikanu milaun rihun ida atus neen neenulu-resin-ualu) no reseita estimada hamutuk dolar US\$ milaun 1.765 (dolar amerikanu milaun rihun ida atus hitu neenulu-resin-lima)

Relaciona ho orsamento despeza nian, Governu propoin ba Parlamentu Nasional katak husi US\$ milaun 1.668 (dolar amerikanu milaun rihun ida atus neen neenulu-resin-ualu): dolar US\$ milaun 235,6 (dolar amerikanu milaun atus rua tolunulu-resin lima, rihun atus neen) sei aloka ba kategoria "salárius no vensimentus"; US\$ milaun 582,3 (dolar amerikanu milaun atus lima ualunulu-resin-rua, rihun atus tolu) sei aloka ba kategoria "Beins no Servisus"; US\$ milaun 329,7 (dolar amerikanu milaun atus tolu ruanulu-resin-sia, rihun atus hitu) sei aloka ba kategoria "Transferéncias Públikas"; US\$ milaun 31,5 (dolar amerikanu milaun tolunulu-resin-dai, rihun atus hitu) sei aloka ba kategoria "Kapítál Menor"; no US\$ milaun 488,8 (dolar amerikanu milaun atus haat ualunulu-resin-ualu, rihun atus ualu) sei aloka ba kategoria "Kapítál Dezenvolvimentu".

Relaciona ho orsamento reseita nian, Governu hakarak atu hetan autorizasaun husi Parlamentu Nasional atu transfere osan ho montante US\$ milaun 996,5 (dolar amerikanu milaun atus sia sianulu-resin-neen, rihun atus lima) husi Fundu Petrolíferu ba konta Orsamento Estadu nian, no husi valór sira-ne'e, US\$ milaun 536,8 (dolar amerikanu milaun atus lima tolunulu-resin-neen, rihun atus ualu) la ultrapasa Rendimento Sustentável Estimado (RSE) ba fundu ne'e, no US\$ milaun 459,7 (dolar amerikanu milaun atus haat limanulu-resin-sia, rihun atus hitu) ne'ebé sei transfere aas liu husi Rendimento Sustentável Estimado (RSE).

Maibé, ha'u hakarak asegura katak montante transferéncia husi fundu petrolíferu aas liu husi Rendimento Sustentável Estimado (RSE), menus duke montante despeza kategorizada hanesan "Kapítál Dezenvolvimentu", ne'ebé relasiona ho investimentu sira ba tempu naruk, ne'ebé bele hatán ba nesesidade infraestrutura país nian,

la'ós de'it ba jeresaun timoroan atuál, maibé mós ba jeresaun futura sira nian, nune'e mós ba nesesidade dinamizasaun no diversifikasiánaun ekónómika país nian ba médiu no prazu naruk.

Kona mós ba orsamentu reseita nian, Governu prevee atu simu US\$ millaun 433,9 (dolar amerikanu millaun atus-haat tolunulu-resin-tolu, rihun atus-sia) husi reseita la'ós-petrolífera; US\$ millaun 7,5 (dolar amerikanu millaun hitu, rihun atus-lima) husi doasaun; no US\$ millaun 73 (dolar amerikanu millaun hitunulu-resin-tolu) husi rezultadu kontratasau empréstimu nian sira.

Ikusliu, no ho konsiderasaun katak grau ezeusaun husi Orsamentu Jerál Estadu liubá, ne'ebé atinje ona 88,2% (porsentu ualunulu-resin-ualu vírgula rua), Governu prevee katak sei transfere ba orsamentu foun, saldu hamutuk US\$ millaun 254,3 (dolar amerikanu millaun atus-rua limanulu-resin-haat, rihun atus-tolu).

Proposta orsamentál ne'ebé sai hanesan objetu debate ne'ebé ohin hahú, bazeia ba dokumentu ne'ebé apresenta ona ba Parlamentu Nasional, iha loron 15 fulan-outubru tinan 2019, no ajusta ona tuir rekomendasau sira ne'ebé jenericamente formula ona husi komisaun parlamentár oioin kona-ba proposta orsamentu ne'ebá nian, durante fulan-outubru no fulan-novembru liubá.

Senhor Presidente,  
Senhoras no Senhores Deputados,

Hanesan iha okaziaun liubá, ha'u iha oportunidade atu hateten ba Kámara ida-ne'e, katak kaer ukun nu'udar ezersísiu ida rasik ne'ebé kompleksu no ezidente, ne'ebé obriga responsavel públiku sira hodi fotu desizaun sira, liuliu desizaun sira ne'ebé liga ho uzu osan públiku nian, ne'ebé maske la satisfás ema hotu nia hakarak, tenke buka atu serve interesse públiku ka interesse jerál ita-nia Komunidade Nasional.

Atu halo-tuir entendimentu ida-ne'e, no atu atinje meta no objetivu sira ne'ebé trasa ona iha nia Programa ba lejzlatura ida-ne'e, maka Governu estabelese ona, ba tinan fiskál ne'e, prioridade ka eixu estratéjiku sira asaun nian hamutuk lima, matadalan ba desizaun nian kona-ba alokasaun rekursu sira, atubele hala'o investimento públiku sira, liuliu: (1) kapital sosiál – moris-di'ak sosiál, protesaun sosiál no sidadania; (2) dezenvolvimentu ekónómiku – investimento iha ekonomia no finansas públikas nasaun nian; (3) melloria konektividade nasional; (4) konsolidasaun no reforsu kona-ba defeza, seguransa no relasoins esternas; (5) konsolidasaun no reforsu kona-ba justisa, demokrasia no direitus umanus.

Entre medida orsamentál sira ne'ebé Governu propoin ba Parlamentu Nasional ba tinan fiskál ne'e, kona-ba kapital sosiál – moris-di'ak sosiál, protesaun sosiál no sidadania, onra ida mai ha'u atubele destaka alokasaun hamutuk:

- US\$ millaun 4,9 (dolar amerikanu millaun haat, rihun atus-sia) ne'ebé destina ba akisiaun medikamentu sira hodi hadi'a kualidade servisu saúde nian sira, ne'ebé presta iha nasaun ne'e;
- US\$ millaun 91,4 (dolar amerikanu millaun sianulu-resin-ida, rihun atus-haat) ne'ebé destina ba pagamentu pensaun sira no harii uma ba veteranu sira;
- US\$ millaun 41,3 (dolar amerikanu millaun haatnulu-resin-ida, rihun atus-tolu) ne'ebé destina atu selu responsabilidade sira Estadu nian ne'ebé liga ba rejime kontributivu no naun-kontributivu;

- US\$ millaun 15,2 (dolar amerikanu millaun sanulu-resin-lima, rihun atus-rua) ne’ebé destina ba provizaun kona-ba pensaun sira ba funsionáriu públiku efetivu sira ho rejime kontributivu;
- US\$ millaun 4,3 (dolar amerikanu millaun haat, rihun atus-tolu) ne’ebé destina atu fó apoiu ba eventu desportivu no atividade oin-oin ba foin-sa’e sira durante tinan ne’e nia laran;
- US\$ rihun 800,000 (dolar amerikanu rihun atus-ualu) ne’ebé destina ba atribuisaun subsídui sira ba eskola privada no eskola C.A.F.E. sira;
- US\$ rihun 500,000 (dolar amerikanu rihun atus-lima) ne’ebé destina ba programa sira empregu nian;
- US\$ millaun 3,2 (dolar amerikanu millaun tolu, rihun atus-rua) ne’ebé destina hodi hola meza, kadeira no komputadór sira ba eskola hotu-hotu;
- US\$ millaun 1,7 (dolar amerikanu millaun ida, rihun atus-hitu) ne’ebé destina hodi hola ambulânsia sira, veíkulu polivalente no veíkulu operasional sira atu apoia atividade monitorizadaun no avaliaun nian;
- US\$ millaun 61 (dolar amerikanu millaun neenulu-resin-ida) ne’ebé destina ba konstrusaun postu saúde no klínika sira.

Entre medida orsamentál sira ne’ebé Governu propoimba Parlamentu Nasional ba tinan fiskál ida-ne’e, kona-ba dezenvolvimentu ekonómiku – investimento ekonomia no finansas públikas país nian, ha’u sei destaka alokasaun hamutuk:

- US\$ millaun 166,4 (dolar amerikanu millaun atus ida neenulu-resin neen, rihun atus haat) ne’ebé destina hodi selu combustivel no manutensaun jeradór elétriku sira iha Hera no Betanu, no ne’ebé inklui manutensaun ba torre tranzmisaun elétrika no ba subestasaun iha lokalizasaun esensiál hitu;
- US\$ millaun 2,1 (dolar amerikanu millaun rua, rihun atus ida) ne’ebé destina ba partisipasaun Timor-Leste nian iha Expo Dubai;
- US\$ millaun 1 (dolar amerikanu millaun ida) ne’ebé destina ba Eventu Internasional husi Komunidade País Lian Portugés (CPLP) no ba edisaun dasanuluk-resin-rua husi Jugu Desportivu CPLP nian ne’ebé sei realiza iha tinan 2020 iha Timor-Leste;
- US\$ millaun 63,8 (dolar amerikanu millaun neenulu-resin tolu, rihun atus ualu) ne’ebé destina atu investe iha dezenvolvimentu Timor Gap nian;
- US\$ millaun 22,6 (dolar amerikanu millaun ruanulu-resin-rua, rihun atus neen) ne’ebé destina hodi fó apoiu ba Autoridade Nasional Petróleo no Minerais (ANPM), Timor Gap no Instituto Petróleo no Jeoloxia (IPG), atu nune’e bele asegura katak Timor-Leste beneficia másimu husi ninia rekursus naturais rasik;
- US\$ millaun 4,0 (dolar amerikanu millaun haat) ne’ebé destina atu rekapitaliza Banku Sentral Timor-Leste (BCTL) no atu selu taxa servisu husi banku ne’e;

- US\$ millaun 1 (dolar amerikanu millaun ida) ne'ebé destina atu rekapitaliza Banku Nasional Komérsiu Timor-Leste;
- US\$ millaun 1 (dolar amerikanu millaun ida) ne'ebé destina hodi fó subsídu ba grupu kooperativa sira;
- US\$ 250,000 (dolar amerikanu rihun atus rua, limanulu) ne'ebé destina hodi apoia kapitál ba feto rurál sira ho objetivu hodi promove emprezariadu femininu;
- US\$ millaun 4,0 (dolar amerikanu millaun haat) ne'ebé destina hodi sosa ekipamentu informátiku ba sentru back-up dadus nian ida, ekipamentu raiu-X no detetór metál sira;
- US\$ millaun 3,4 (dolar amerikanu millaun tolu, rihun atus haat) ne'ebé destina hodi sosa veíkulu pezadu sira;
- US\$ millaun 238,3 (dolar amerikanu millaun atus rua tolunulu-resin ualu, rihun atus tolu) ne'ebé destina ba Fundu Infraestrutura, liuliu, ba konstrusaun sentru formasaun exelénsia ida.

Entre medida orsamentál sira ne'ebé Governu propoin ba Parlamentu Nasional ba tinan fiskál ida-ne'e, kona-ba melloria konektividade nasional, ho onra, ha'u sei destaka alokasaun ne'e hamutuk:

- US\$ millaun 31,1 (dolar amerikanu millaun tolunulu-resin-ida, rihun atus ida) ne'ebé destina ba fundu kontrapartidas, ne'ebé inklui despeza sira atu sosa naviu sira hodi patrulla fronteira marítima sira no sosa ferry Nakroma II;
- US\$ millaun 3,0 (dolar amerikanu millaun tolu) ne'ebé destina ba provizaun foun sira ba aviasaun sivil.

Entre medida orsamentál sira ne'ebé Governu propoin ba Parlamentu Nasional ba tinan fiskál ida-ne'e, kona-ba konsolidasaun no reforsu ba defeza, seguransa no relasaun esterna sira, ha'u sei destaka alokasaun hamutuk:

- US\$ millaun 2,8 (dolar amerikanu millaun rua, rihun atus ualu) ne'ebé destina ba pagamentu kuota iha instituisaun internasional sira;
- US\$ millaun 1,5 (dolar amerikanu millaun ida, rihun atus lima) ne'ebé destina ba sekretariadu G7+ nian;
- US\$ rihun 800,000 (dolar amerikanu rihun atus ualu) ne'ebé destina hodi fó apoiu finanseiru internasional;
- US\$ millaun 1,8 (dolar amerikanu millaun ida, rihun atus ualu) ne'ebé destina atu sosa ekipamentu sira protesaun no komunikasaun nian ba Ministériu Defeza nian;
- US\$ rihun 800,000 (dolar amerikanu rihun atus ualu) ne'ebé destina atu sosa ekipamentu protesaun nian ba Polisia Nasional Timor-Leste;
- US\$ rihun 900,000 (dolar amerikanu rihun atus sia) ne'ebé destina ba rekrutamento membru foun 600 (atus neen) ba Força Defeza Timor-Leste (F-FDTL).

Ikus-liu, entre medida orsamentál sira ne'ebé Governu propoin ba Parlamentu Nasional ba tinan fiskál ne'e, kona-ba konsolidasaun no reforsu justisa, demokrasia no direitus umanus, ha'u iha onra atu destaka alokasaun hamutuk:

- US\$ millaun 6,0 (dolar amerikanu millaun neen) ne'ebé destina atu fó subsídu ba partidu político sira no nune'e kontinua hakbiit prosesu demokrátiku iha Timor-Leste;
- US\$ millaun 4,0 (dolar amerikanu millaun haat) ne'ebé destina ba konstrusaun igreja Bekora no Aimutin, nune'e mós ba Templa Protestante sira, no mós, atu fó apoiu ba Organizaun Naun Governamental sira (ONG);
- US\$ millaun 1,7 (dolar amerikanu millaun ida, rihun atus-hitu) ne'ebé destina atu fó subsídu ba Radiotelevizaun Timor-leste (RTTL) no ba Tatoli - Ajénsia Notisioza Timor-Leste.

Ha'u hakarak aproveita biban ida-ne'e atu apela mós ba apoiu Parlamentu Nasional ba medida orsamentál sira ne'ebé Governu propoin kona-ba atu hakle'an prosesu desentralizasaun administrativa, liuhusi alokasaun hamutuk:

- US\$ millaun 3,0 (dolar amerikanu millaun tolu) ne'ebé destina atu prienze vaga sira ne'ebé ezistente iha mapa pesoál husi Autoridade Munisipál no Administrasaun munisipál sira; no hamutuk
- US\$ millaun 9,4 (dolar amerikanu millaun sia, rihun atus haat) ne'ebé destina atu fó apoiu ba projeto oin-oin ne'ebé Autoridade Munisipál no Administrasaun Munisipál sira promove, liuliu iha ámbitu Planu Dezenvolvimentu Integradoo Munisipál (PDIM).

Governu kontinua halo tuir kompromisu político no konstitusionál atu implementa desentralizasaun administrativa, no, ba ida-ne'e, define ona calendáriu ida, iha ne'ebé prevee katak durante tinan ne'e sei hahú prosesu avaliaasaun ida kona-ba ezisténsia kondisaun mínima atu estabelese autarkia munisipál sira.

Senhor Presidente,  
Senhoras e Senhores Deputadus,

Medida orsamentál sira ne'ebé ha'u foin hato'o ho forma badak reflete loloos esforsu ne'ebé Governu halo ona atu dezenvolve proposta orsamentál ida ba tinan fiskál ne'e, ne'ebé bele estabelese ekilíbriu nesesáriu no kompromisu entre kumprimentu ba objetivu programátiku sira no, iha tempu hanesan, fó atensaun loloos ba preokupasaun sira Parlamentu Nasional nian kona-ba sustentabilidade husi fundu petrolíferu no kualidade despeza pública nian.

Loos duni katak, Governu hakarak atu hetan rekursu finanseiru sira ne'ebé boot liu, atubele iha kapasidade ida ne'ebé boot liu hodi promove moris-di'ak no kualidade moris husi família timóroan sira, no mós atu dinamiza itania setór produtivu nasional. Maibé, konxiente kona-ba importânsia atu fó orsamentu ida ba Estadu, ne'ebé bele garante ninia atividade finanseira, ho tempu ne'ebé lais no posivel, Governu hato'o proposta orsamentál ida-ne'ebé konservadora liu, ho konviksaun katak, bele hatán ba nesesidade imediata sira iha ita-nia setór ekonómiku

no sosiál no sei halibur kondisaun hirak ne'ebé nesesária atu hetan aprovisaun husi Parlamentu Nasionál no promulgasaun husi Prezidente Repúblika.

Hanesan baibain, dokumentu ne'ebé ohin ha'u, ho onra boot, hato'o ba imi, Exelénsia sira, maka dokumentu ida ne'ebé bele hadi'a no aperfeisoa, prosesu sira-ne'ebé bele alkansa de'it liuhusi diálogu ida ne'ebé pozitivu no produtivu entre Membru sira husi ha'u-nia Governu no ilustres Deputadus Parlamentu Nasionál sira hotu, durante loron hirak tuirmai.

Ha'u fiar-metin nafatin katak, Governu no Parlamentu, hamutuk, sei bele debate no hetan solusaun konkreta sira hodi hatán ba problema reál sira husi ita-nia sidadaun sira, hodi impulsiona ita-nia ekonomia no hodi konsolida ita-nia demokrasia.

Hanesan iha tempu uluk, liuhusi uniaun no mobilizasaun Timoroan hotu-hotu de'it maka ita bele manán dezafiu dezenvolvimentu nian no husik hela ba jerasaun sira tuirmai Nasaun ida ne'ebé próspera, justa no solidária ba Timoroan sira hotu.

Ba Timor-Leste ida-ne'ebé modernu, dezenvolvidu no prósperu liután!

Na'i Maromak haraik bénсаun mai ita-hotu!

Obrigadu barak.